

## **Dithero tsa Tirelano mo Kutlwanong**

***13/2014 Ka Sontaga wa 4 morago ga moletlo wa Epifania, e le ka 02. 02. 2014***

**MO LEINENG LA MODIMO O E LENG RARA LE MORWA LE MOWA O O BOITSHEPO!**

1. Sefela sa 261 - 243/253

**2. Thapelo:** Morena Jesu, o re itshepise mo boammaaruring. Lefoko la gago ke la boammaaruri. Amen.

3. Epistolo ka fa thulaganyong ya 2 e kwadilwe mo go 2 Bakorinthe 1:8-11;

Efangele ka fa thulaganyong ya 1 e kwadilwe mo go Mareko 4:35-41.

4. A go ipolelwe tumelo ya bokeresete!

5. Sefela sa 369 -341/348

6. Thapelo ya mmadi wa thero.

**7. Lefoko la thero** ka fa thulaganyong ya 6 le kwadilwe mo go Genesi 8:1-12, le re: "Jaanong Modimo wa gopola Noa le diphologolo tsotlhe le diruiwa tsotlhe tse di neng di na nae mo mokorong. Modimo wa fokisa phefo mo lefatsheng, mme metsi a ngotlega. Ga thibala metswedi ya madiba le maroba a legodimo; le pula e e tswang kwa legodimong ya kgaotsa. Metsi a nna a boa, a fokotsega mo lefatsheng; ya re malatsi a le 150 a sena go feta, metsi a nna a ngotlega. Ka kgwedi ya bosupa, ka letsatsi la some supa ka kgwedi, mokoro wa nna mo thabeng ya Ararate. Metsi a nna a ngotlegela pele go ya kweding ya some; ka la ntlha la kgwedi ya some ga bonala ditlhoa tsa dithaba. Ya re malatsi a le 40 a sena go feta e a e dirileng, a ntsha legakabe; lone la tswa, la boaboa go ya metsi a ba a tšhe mo lefatsheng. A ba a ntsha leeba, la tloga mo go ene, e le gore a bone, fa metsi a ngotlegile mo lefatsheng. Ya re ka leeba le sa bone le fa e le bogato jwa lonao, la boela kwa go ene mo mokorong; gonne metsi a ne a sa ntse a le mo lefatsheng lotlhe. Ke fa a ntsha letsogo, a le tsaya, a le busetsa kwa go ene mo mokorong. Ya re a sena go leta malatsi a supa a mangwe, a ntsha leeba gape mo mokorong. Leeba leo la boela kwa go ene ka nako ya mantsiboa, la tla le tshotse letlhare le lešwa la setlhare sa olefa ka molomo. Ke fa Noa a lemoga gore metsi a ngotlegile mo lefatsheng. A leta malatsi a supa gape, a boela a ntsha leeba, mme lone la se ka la boela gape kwa go ene." Amen.

**8. Thero:** Phuthego ya Morena, "Modimo wa gopola Noa le diphologolo tsotlhe le diruiwa tsotlhe tse di neng di na nae mo mokorong." Ga diragala jalo morago ga morwalela. Tiragalo eo e e tshabisang ya khutla jalo, ya re batho ba lefatshe lotlhe ba ne ba nwela mo metsing. Ga bolokwa Noa le ba ntlo ya gagwe fela. Re ka reng, fa re akanya ka ga tiragalo eo? Jesaya o kwadile, a re: "Ruri, wena o Modimo o o fitlhegileng; wena Modimo wa Iseraele, o Mopholosi!" Jes. 45:15; gape a re: "Gonne MORENA a re: "Megopolo ya me ga se megopolo ya lona, le gona ditsela tsa lona ga se ditsela tsa me. Gonne ditsela tsa me di okame ditsela tsa lona; le gona megopolo ya me e okame megopolo ya lona jaaka legodimo le okame lefatshe," Jes. 55:8-9; Jeremia o ne a kwala, a re: "Gonne Morena ga a latlhele ruri. Gonne fa a utlwisitse motho botlhoko, o tla mo tlhomogela pelo gape, jaaka a le mapelonomi a magolo. Gonne ga se gore o a kgatlhega, fa a tlhokofatsa batho, fa a ba babogisa," Dil. 3:31-33; Paulo o akaretsa tse tsotlhe tseo, a re: "A boteng jwa khumo le jwa botlhale le jwa kitso ya Modimo! Dikatlholo tsa ona ga di na totolotso jang ne, le ditsela tsa ona ga di na tlhotlhomiso jang ne! Gonne ke mang yo o itsileng maikaelelo a Morena, gongwe mogakolodi wa gagwe e ne e le mang? Gape ke mang yo o mo neileng pele se o tla se busediwang? Gonne dilo tsotlhe di tswa go ene, di teng ka ene, di ya go ene. Tlotlo a e nne ya gagwe ka bosakhutleng!" Baroma 11:33-36.

Modimo wa latlhela tlholego ya ona mo tshenyegong e kgolo ka morwalela. Wa direlang tseo? MORENA wa bona le go atlhola, wa re: "Bosula jwa batho ke jo bogolo, le maano otlhe a dikakanyo tsa dipelo tsa bone di bosula fela ka metlha," Gen. 6:5. Le fa go ntse jalo, o ne wa simolola se sešwa ka Noa le ba ntlo ya gagwe. Wa se direlang? Noa a bona bopelotlhomogi mo matlhong a MORENA, Gen. 6:8. A boteng jwa dikakanyo tsa ona! Modimo wa gopola Noa, jaaka o ne wa gopola Aborahama, le Rahele, le Hana le ba bangwe. Re ka re: Tiragalo ya ga Noa ke tiragalo ya rona. Fela jalo Modimo o dirile se sešwa ka go simolola se sešwa ka Morwaaona Jesu Keresete.

Modimo wa gopola Noa, fela jalo o gopotse batho ba ona, jaaka re utlwa ka moletlo wa go gopola botsalo jwa ga Jesu. "Mme ya re sebaka se e leng sona se sena go tla, Modimo wa roma Morwaa-ona, a belegwa ke mosadi, a nna fa tlase ga molao gore a rekolole ba ba laolwang ke molao, mme re tle re amogele bongwana," Bagal. 4:4-5. Modimo wa dira se sešwa ka batho botlhe ba lefatshe lotlhe. Jaaka o ne wa gopola Noa, o sa ntse o re gopola rona rotlhe, go ya mo letsatsing la kajeno, o a go gopola, o a nkgopola, ka letsatsi le letsatsi la botshelo jwa rona.

Modimo o simolotse go dira se sešwa mo go mongwe le mongwe yo o kolobeditsweng ka letsatsi la kolobetso ya gagwe. Metsi a kolobetso ke metsi a botshelo, a tlhapo ya go tsalwa

gape le ka ntšhwafatso ya Mowa o o Boitshepo ka bopelotlhomogi jo bogolo jwa ona. A fa lokwalong lwa ga Petoro tiragalo ya ga Noa e kopantswe le kolobetso, jaaka go kwadilwe mo go 1 Pet. 3:20-21 gore "Modimo o ntse o iketlile ka bopelotelele mo malatsing a ga Noa, go sa ntse go baakanngwa areka e batho ba se kae, e bong ba ba robedi fela, ba ba bolokilweng ka yona mo metsing. Ke ona a le lona a lo pholosang kajeno kolobetsong, e le setshwantsho sa yona, e se go tlosa leswe la mmele, mme e le go kopa segakolodi se se siameng mo Modimong ka tsogo ya ga Jesu Keresete." Tseo ke tsa pholoso ya rona, ke kgomotso le boitumelo jo bogolo mo malatsing a a bokete, mo malatsing otlhe a re tsamayang ka ona mo lefatsheng. Re kolobeditse. Re bana ba Modimo. "MORENA o ne wa bua mo pelong ya gagwe a re: 'Ga nkitla ke tlhola ke hutsa lefatshe gape ka ntlha ya motho; gonne dikakanyo tsa pelo ya motho di bosula go tswa bonyaneng jwa gagwe,'" Gen. 8:21. Ka jalo o re utlwela botlhoko, go fitlha mo letsatsing la kajeno. Fela jalo o sa ntse wa boloka lefatshe la ona le tsotlhe tse di mo lefatsheng kajeno, le ka mamoso, go ya mo letsatsing la bofelo.

Modimo o re dumelela go bona mo ditiragalong tseo mo teng ga pelo ya ona. Re bonang teng? Lorato, bopelotlhomogi, bopelonomi, bopelotelele, kutlwelobotlhoko, le fa re ntse re le baleofi go tswa mo bonyaneng jwa rona. O re utlwela botlhoko rona baleofi ba re tlhomolang pelo, re le bana ba bogale le ba loso ka fa tlhagong ya rona. Modimo o re baakanyeditse phatlha e ntšhwa, o re fa tsholofelo, o re abetse botshelo jo bošwa, le re ntse re le ba ba ntseng jalo, jaaka re ntse go tswa mo bonyaneng jwa rona. O boloka botshelo jwa rona ka kwano, o re baakanyeditse botshelo jo bo sa khutleng mo go le le tlang. O re abela kagiso mo segakoloding ka go itshwarelwa maleo a rona a a sa balweng.

Modimo o romile Morwaa-ona yo o rategang yo o tsetsweng a le esi Jesu Keresete, wa mo neela mo losong lwa sefapaano gore rona re se swe. Ke gona re itseng, le go dumela gore re tla tshela, le fa re ka swa, go rerwe ditiro tsa MORENA. Mo dipatikegong, mo matshwenyegong, mo ditlalelong tsa botshelo jono re tlhomamiseditswe mo tumelong, fa Modimo o le teng, e le Rara yo o rategang wa rona, le Mopholosi le Mogomotsi. Morena Jesu Keresete re a leboga, o nne o re utlwele botlhoko. Amen.

**9. Thapelo:** A re rapeleng ka thapelo e e rapelelwang mokolobediwa ka fa thulaganyong ya Lokwalo lwa thulaganyo ya kolobetso, re re: Modimo Mong-wa-thata-yotlhe, o o se nang tshimologo, le e seng bokhutlo, ka fa katlholong e e thata ya gago o sentse lefatshe le le sa dumeleng ka morwalela wa metsi, mme ka bopelotlhomogi jo bogolo jwa gago o bolokile modumedi Noa, le ba ba supang ba losika lwa gagwe, o nweditse Faro le mophato wa gagwe

mo lewatleng, mme wa kgabagantsha morafe wa gago wa Baiseraele mo go lona ka go ba tsamaisa mo mmung o o omileng. Ka go dira jalo wa tshwantsha tlhapo eo le kolobetso e e boitshepo ya gago, wa itshepisa ka kolobetso ya ngwana wa gago, Morena wa rona Jesu Keresete, le go itlhaolela Jortane le metsi otlhe go nna morwalela o o tshegofatsang le tlhapo e kgolo ya maleo. Ka moo re go kopa ka ntlha ya bopelotlhomogi jo bo sa lekanngweng le sepe jwa gago gore o lebe mokolobediwa yo, o mo tshegofatse ka tumelo ya nnete mo Moweng o o Boitshepo gore ka tlhapiso eo a tsalwe sešwa, tsotlhe tse a tsetsweng a na le tsona tse di tswang mo go Atame, le tse a okeditseng ka tsona di nwediwe, di tlosiwe mo go ene gore a kgaoganngwe mo palong ya ba ba sa dumeleng, a bolokwe sentle mo arekeng ya kereke ya bokeresete, a direle leina la gago ka metlha ka mowa o o tlhoafetseng, o o itumelang mo tsholofelong, a baakanyediwe mmogo le badumedi botlhe ka fa tsholofetsong ya gago go bona botshelo jo bo sa khutleng ka Jesu Keresete, Morena wa rona. Amen. Thapelo ya Morena: Rara wa rona yo o mo legodimong ...

#### 10. Sefela sa 371 -343/350

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke K. G. Tiedemann ka ngwaga wa 2013.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.